

四庫全書

集部

# 欽定四庫全書

集部

懷麓堂集卷五至七

詳校官監察御史<sub>臣</sub>范衷

中書<sub>臣</sub>劉源溥覆勘

總校官編修<sub>臣</sub>王燕緒

校對官待詔<sub>臣</sub>胡士震

謄錄監生<sub>臣</sub>周嘉猷

欽定四庫全書

懷麓堂集卷五

明 李東陽 撰

詩稿五

五言古詩

和沈地官時暘遊城西朝天宮韻

歲晏冰雪至閉門戒深冬窮陰結晶巖寒氣開鴻濛豈  
徒罷遊謁客至出亦慵牀頭抱膝卧布被圍熏籠沈侯

心神霽顏色如春融十日不一見何以寫我悰  
竭來城西遊杖屨誰與同仙蹤躡樓觀帝樂聞笙鏞  
巍巍三珠林中有萬歲峯俯聽塵世喧衆竅號秋蛩  
仰睇逐餘景流歌遡長風邈哉虛無教古昔聖所攻  
君懷度支計惜此繪畫功疇哉百川障頓使狂瀾東  
皇明統六合聲教通蠻戎兩京鬱相望城闕何葱葱  
龍盤萬嶺合虎踞千山重我昔往觀之湯池帶金墉  
君時在南署邀我回青驄周旂絢日月漢掌開芙蓉  
層臺與列署照耀當虛空

逢僧問堯率訪道疑方蓬壯懷益磊砢陋目開昏蒙至  
今腸腎間尚覺百彙充適遭明良運感激惟寸忠堯門  
闕賢俊舜法除奸凶孰云閭閻幽上與廊廟通君王垂  
衣坐百職分卑崇我冠謬通籍立在明光宮願為千尺  
蘿附君百丈松君今已彊仕我亦非兒童及時不努力  
倏忽成老翁閒官遠書簿夙夜不在公校讐費年月官  
長多涵容美醞亦可戀大庖宰相供文章本非職篆刻  
徒為工班超晚投筆猶得班羅熊吾憐功名遂非慕萬

戶封不然赴林壑此興頗亦濃買田種桑稻躬耕課奴  
僮緬思太行愿斂退真吾宗知君負經濟我力非寅恭  
論功愧不逮內省面發紅誤將鉛刀鈍欲比鏌鋣鋒狂  
言試傾倒拍塞已滿胃君方賈餘勇逸氣凌崆峒紛然  
萬丘垤盡在塵埃中勲名唾雙手祿食輕千鍾平生四  
方志慷慨隨桑弓遊觀匪獨樂樂事豈易逢歌以報君  
意我懷安可窮

與李中舍應禎同飲時賜邸歸疊前韻

我昔與君別京華三見冬遠遊隔江海離思沈空濛相  
逢問衷曲欲說已復慵吾生苦多難憂患為樊籠柔腸  
結成寸意氣慘不融哀琴與斷瑟曲罷傷遺踪嗟子亦  
何為所遭良獨同微霜降平地響應豐山鏞一語再三  
歎對坐感兩峯君為空中鶴我作牆下蛩孤鳴比咽調  
各自悲秋風愁城正突兀險絕難為攻幸當樽俎間賴  
此麴蘖功李侯君鄉彥來自東鄰東劇飲慕太白清談  
勝王戎當筵列盛饌豈論麥與葱山穀百種雜海錯千

盤重閉門謝俗客不遣窺垣墉解我腰間魚繫我櫪上  
驄芳詞吐珠玉醉臉開芙蓉仰視天宇高坐覺浮雲空  
興狂欲起舞兩袖如旋蓬向非地主賢感激安所蒙酒  
酣出詩句卷帙繁已充得非黃山谷或者蘇文忠初如  
決洪水勢感崇伯凶又如驟天馬霧鬣天池通如登巨  
鰲背足躡三山崇珠光照海月下徹馮夷宮我乃路傍  
蒿不如山上松亦不如李桃餘娑媚兒童向來忘得失  
我已效海翁狂言久閉口一發偶為公起辭屢被肘顧



我少從容自言有枰碁可以爲子供勝欣敗亦喜有技  
豈必工君看敵國手峙立如貌熊誰云一丸泥可作萬  
雉封李侯掀髯笑謂我此味濃推手覆君局餘歡付蒼  
僮古來風流事多出文章宗如何嵇阮流棄禮蔑敬恭  
桓桓卞將軍怒頰爲之紅至今想風采齒古生寒鋒寧  
將激灑杯滌此磊砢胷國賦出吳會王師在崆峒頻年  
值水旱力盡經營中微官竟何事簪佩隨朝鐘平生幾  
丁字愧彼兩石弓笑談一開口塵世真難逢從茲戒耽

樂樂事慎勿窮

齊山書舍詩

進士王允達讀書處也允達待制忠文公之曾孫義烏人

浙東文獻裔吾見忠文孫讀書金華郡結屋齊山村舉  
頭瞰青嵒儼若先公存文章與節義實並茲嵒尊齊山  
乃支派拱立如諸昆景行在瞻仰極力窮攀援藏修三  
十載獻策承明門上書乞鄉校奉祀修蘋蘩銓曹不為  
覆告諭復且溫幽懷耿中夜夢與山靈言松楸我廬墓  
桑梓我田園烟雲護我扉風月主我軒吾方效王事再

拜酬深恩終焉丘壑心不愧鶴與猿山靈輟然去夢覺  
日已曠竭來登我堂感我思欲騫卓哉先賢後典刑我  
所敦斯文孰砥柱浩蕩狂流奔老成不可作此意更誰  
論

和蕭封君鳳儀遺詩四十韻

鳳儀吳人早卒有  
生辰感興詩其子

工部主事

奎藏于家

世運迭推代昔聞桑海三萬物若久存金石或未堪君  
看垂髫子老髯雙鬢髮終焉山丘葬豈論黠與慙東吳

有蕭子結髮稱奇男昂霄出塵壒氣與虹蜺參少年不  
自耀外斂中包含置身向經史出入同秋蟬分陰每自  
惜癖性久愈耽詞鋒極淬礪理窟窮搜探文如南山豹  
空谷凝雙眈光如蒼精龍盤屈在一函又如鯨鯢輩海  
底深波涵生當聖明時未獲雨露覃秋姿折蒲柳晚色  
凋樟楠流光不少待曦馭無歸驂生乏軒冕榮死寧丘  
壑慚寂寥虞山下數尺封如龕有井勿多汲井竭因泉  
甘有玉勿頻磨玉折難成簪奇才固不壽聞者心為惔

當年懸弧宴綠筍羅黃柑華裾亂雲日舞衰迴烟嵐溪  
魚出越笥隣酒傾吳壘餘商發古調哀響流江潭永懷  
奉母日衣綵隨輿藍劬勞念罔極往事空遺談色養苦  
不逮敢於微祿貪軻機忍復斷路米誰為擔歌成轉悽  
惻肝腑攢戈鐔是時夜正黑孤星暗天南落月噉崑狄  
悲風嘯林彪蒼黃三十載蔓草荒寒菴官曹繼清白舊  
業惟餅飢屈建祭無芟嗜好豈不諳坡翁寶畫板身自  
盟瞿曇君有孝子誠而無流俗酣貽謀在文字況乃青

於藍遺編襲蜀錦異楮開倭蠶壽公身後名可以齊鏗  
聃

陳王汝所藏朱澤民畫

睢陽書家流作畫如作草松根石峻嶒健筆凌絕島垂  
蘿飄人衣盤石坐不掃鳴琴聲差差石籟風稍稍君看  
蕭散姿稱彼林下老遺縑百年內嵐氣濕不槁陳郎湖  
海情得此恨不早我生不學畫入眼分醜好嘗觀耆舊  
傳歎息風流少此意君獨知丹青安足道

寄題謝寶慶逸老堂得乞字

寓形大塊間俯仰孰非物復為物所累轆軋何終訖君  
昔守湖南馳驅奉綸綍晨興必簿訟夜坐猶佩韍民憂  
與國計我抱恒鬱鬱居愁嵐霧蒸路駭江飈颭秋霜復  
春露歲月胡太倏遙憐使華返歸念朝衣拂孤桐載還  
輕五柳栽始苑天台峻宜登滄海清可被鍾阜休移文  
鑑湖安用乞逸驥方脫銜冥鴻不受尉天時迭推代物  
理有伸屈達人諒宜然吾道豈云第行藏二十載夢覺

徒髣髴萬事付三緘高談不如吃心閒力愈健百疾謝  
攻熨曠懷浩無涯勁氣老猶伉思君遠莫覲佇彼高風  
屹起望赤城霞文光正輝蔚

和謝于喬修撰雲山圖聯句韻兼懷沈仲律

俯仰天地間吾人有高興圖畫亦偶遭詩壇乃前定屏  
當廣座設壁與長縑局幽懷惋百結醉眼豁雙情沃盥  
平若掌橫波急如絙頽雲澹將沈瀚海寒欲凌中峯儼  
尊長衆壑分婢媵羣坳訝空礪百折愁絕嶝包羅引地



絡混沌洩天孕烟橫似張幃露濕同覆甌  
葩葩綻將然谷鳥呼若醒憑虛敞軒闥  
眺遠失梯筓塵消埜馬沒地濕晴蛻蒸  
江光晃無垠石籟差可聽得非茱萸泝  
或者柴桑徑洗耳幽澗泉清心遠林磬  
閒貪野芳採飽厭山穀飮流光難把玩  
富貴安足凭樂事希狂曾明時豈愚甯  
求之不可得何以攀逸乘流水宿有期  
幽蘭香誰贈吾生尚驅逐茲意方踴蹙  
憶當風日佳樂此賓主勝幽期予獨負  
往券真足證重披意俱新未接神已凝  
雄誇

鳳樓手規制皆畧稱苦憶勇冠翁風流遠猶賸玩賞在  
樽壘淹留謝羈銓多才復愛客吾語非子佞努力青雲  
期交盟豈虛訂

竹岡別業

崇岡何逶迤叢竹蔚交翠下有幽人居蕭然絕蕪穢繁  
陰坐層還落葉時一墜緬懷塵外遊及此林下醉從來  
泉石性不愛軒冕貴呼酒酬此君與子終晚歲媚哉東  
園華寂寞有餘愧平生貞晦情茲物乃其類欲作招隱

歌羞為宦途說因君憶林壑未免形骸累炎天增鬱蒸  
中夜不得寐遠睇天東南涼秋起遐吹

題瀛州圖送陸翁東歸

閉門六月雨堆案多詩書陸君索我詩僮僕走且呼麾  
之不肯去堅卧庭前除一朝再三至我已愧此奴空堂  
展圖畫倦眼開模糊層樓挾翥鳳倒景凌飛鳧翠羽色  
婀娜金支光有無依微動天籟彷彿聞笙竽不知何方  
境乍可留須臾昔逢滄洲子云是登瀛圖如聞六合外

復有真蓬壺吾方困炎溽頗欲超寰區自嗟塵凡骨或  
與神仙殊君家老仙客被服雲霞裾仰視園中人飄飄  
豈其徒當攜方平子共解雙明珠垂竿拂海月舉手招  
天吳吾能操几杖欲往不得俱惟將作詩意目送歸江  
湖

師召席上餞邵文敬戶部使淮安得作字

玄雲鬱重陰霖雨久逾大平田偃頽波萬彙同一挫累  
纍黍穗落百畝不盈箇淮陽舊宜麥未足供甌磨稊稗

價亦增誰能問粳糯官租苦未給生理安可作城市多  
游民山林有遺餓流離及溝壑去住總無奈地連兩畿  
邇業恐千家破近聞恩詔下已放今年課漢臣發諸廩  
唐法通百貨王事須賢勞地曹有良佐名辭鴻臚籍檄  
自尚書座行哉車馬艱詎免泥塗浣東南民力竭要使  
皇仁播官雖問升斗職豈在揚簞平生翰墨場珠玉生  
咳唾簿書劇裁決餘暇得酬和羣情恣幽眇品類入搜  
羅德澤乃膏腴文章比糠莖舉世輕迂談茲言我當坐

偶託平生交因君識吾過君當策勲伐極力起貪懦聊  
因贈行什預卜還朝賀

題李源西城草堂

魏公中山裔家有綱紀臣李姓源其名廣額而長身歷  
事及胄子登堂拜夫人魏公肅家政鉅細必見詢公少  
嗣封爵朝謁隨楓宸禮官引班次甲乙頗失倫布衣入  
東省直造尚書門鬚髯奮如戟畫地請具陳中山國佐  
命配享高帝神功勲與歲月粲若羅星辰雖言尺寸階

要使白黑分尚書不能答胥隸不敢嗔遂令魏國籍迴  
絕諸公塵向非三寸功曷使大義伸茲事尤卓絕流芳  
播前聞今年過七十景迫桑榆鄰公恩賜休假始得辭  
昏晨買田種桑稼卜築西城闔功成斂身跡此意亦近  
真餐素夙所恥爽然思爾羣題詩草堂壁俯仰意無垠  
題聽琴圖寄天錫

幽齋落日晩援琴寓我煩絃疎不成調但有古意存一  
絃三歎息自謂和者難自從別君來山高水潺湲衆好

諧莫送置之不復彈曲看畫中人頗與吾意關題詩寄  
遠道慰此平生歡

題王維詩意圖

平田渺成湖仲夏月多雨汀鷺濕不飛林鶯溢還語村  
烟多乞鄰饁餉常及午柴門無鎖鑰出入隨杖屨白鷗  
似相識亦足忘爾汝王丞詩家流畫格亦天與君看百  
代遺摹搨尚如許吾生慕丘壑偶此繫冠組試問松下  
翁幾人同出處



送錢先生致仕得臆字

成化己亥冬公來自南國維時龍興節奉表宸旒側入  
朝未浹辰具疏寫衷臆臣年七十二鬚髮不復黑乞身  
謝主組歸老東南域願為南極星中夜常拱北時當太  
平世聖壽千萬億臣雖在畎畝永荷陛下德聖皇眷耆  
舊曰汝予輔翊古稱老成人豈獨賴膺力吾當獎休退  
卿意誠悃幅加官號冢宰名位班九棘貤封及三世茲  
典尤絕特公章再入省請解尚書職臣方避華要而敢

蒙顯陟王言重丁寧公意增感刻願書歸榮字堂扁揭  
華織昭代垂憲章鄉人有矜式公卿睹盛事道路眼為  
拭江山佳麗地從此生顏色公夙梁棟資先朝手親植  
文章夷夏滿姓字兒童識帝惜漢馮唐天留宋蘇軾出  
入四十年終焉布衣極雲鵬忽稅駕斂彼高飛翼仕路  
豈不多屈指難再得菲材出門下久此玷棖杙再拜送  
公歸臨風遠相憶

夜飲王世賞餞別乃兄婺源丞中宣得小字

高堂粲華燈移席散清醪天寒羣鵲飛月出衆星眇我  
馬東南來風髮疾於鳥羣公各登壇白戰已先佻吹竽  
終濫齊會食慙後趙王君簪纓家世遠風流紹文章醉  
鄉後意氣雲臺表仲氏方嚮庸丞哉未為小賢勞念驅  
馳及此公事了南都山水麗晚歲冰霜少詩腸正百結  
况復離心繞留連感中夜明發待清曉江天渺思君但  
見孤鴻矯

除日追和坡詩三首

餽歲

官曹接居鄰欣戚每相佐古人重交際末路頗近賀箱  
盈綵繒積黍出豚羊大晨闇已將迎夜僕不得卧侯門  
倉廩溢委藉紛四座寧知貧家食不自供甑磨禮豈使  
之然盛極乃為過千載東坡翁詩成幾人和

別歲

暮聞歲將別去矣不復遲呼酒持餞之可餞不可追歲  
來莽何從歲去茫無涯但恐慷慨顏不如年少時誰謂

歲去留不與我瘠肥聊同駢豎喜勿學癡翁悲歲去固  
莫留歲至亦莫辭回看故吾在努力幸未衰

### 守歲

君看守歲法如畫有足蛇蛇足不可添歲行寧可遮舊  
歲如可守奈此新歲何聊為坐終夜杯酒成謹譁朝衣  
尚未整櫪馬且未撾吾非杜陵翁歎此暮景斜高堂椒  
花頌歡樂勿蹉跎惟應一日養欲與三公誇

上元後一日亨父席上得合字

長安佳麗地冠騎紛駁還時維上元節塵塏騰四踏華  
風藹春溫香霧凝夜合魚燈照空明獸炭隱殘爇侯門  
道路擁金翠有遺釵街衢兒女喧老稚相噂沓官閑常  
閉戶吾性頗耐雜忽聞好事邀詩興翩已颯高堂列盤  
饌解帶方滿榻肥烹飫庖羊錯薦繁海蛤更深席屢煖  
歸袂每被拉春光僅九十轉眼過半百當時曲江遊庚  
癸驚再匝佳兒喜在抱何必勝佩韜語長意未窮賓主  
同一嗒悲歡勿重道且放陳遵閣

## 哭牛兒

今日復何日忽此涕淚垂骨肉能幾何此淚來無時兒  
生不滿晷遂作終身期若非天屬緣誰遣夢我罷憶汝  
初生質冰華粲瓊枝筋力不及兄清澈似過之嚴翁撫  
兩孫足慰二子思婆攜母復抱傳玩爭欣嬉吾弟蚤淪  
沒後生者難追分支繼中絕亦以存孤嫠孰謂既死身  
不能庇一兒空齋坐無語一感百念隨豈不達死生我  
哀心獨知登堂慰顏色已矣不復悲餘情或未釋昨夜

夢在茲

寄題南京太常劉先生清風亭

崇臺敞華構傑閣開寵從靈飈下虛亭萬籟聞天聰過  
松含浙瀝戛竹鳴琤琮清池逆素浪碧草翻幽叢神仙  
足官府中有瀛洲翁坐絕簿書勞門無車馬蹤振衣木  
葉下一嘯千山空長安舊塵土極目東華東起看十二  
樓迴在高寒中君王垂衣坐禮重古秩宗懷哉夙夜心  
上與明神通平生陳無已再拜曾南豐上界接高躅南



都懷昔逢茲亭實名勝有意相追從臨朝送山甫作頌  
慙清風

避雨于喬夜歸翌日得師召詩知宿亭父宅戲

次其韻

我留謝君飲君主張侯宿還因越溪釀更慕吳粳粥纓  
蓑掛涼雨袍笏謝炎燠曉起聞叩門開絨見心曲同遊  
二十載聚散難預卜朝飡太倉飯暮引玉堂燭悲歡同  
一初少壯如兩轂世故勿苟談此身聊自足文章亦劇

戲勿謂遭我毒他時究淵源請檢歸田錄

久旱

昔旱或踰時今焉倏經歲三冬無一白五月燠猶熾火  
雲堆若山赤日光射地風伯誰使狂雷師空作勢草根  
枯欲盡井水涸難繼春甍無復論秋穀不得藝煖陽動  
成火乖氣復為厲奪攘半幽燕流徙窮晉魏蒼生爾何  
辜氣數偶相值靜言求其端幽遠安所致仁愛理則然  
乾封豈天意恭聞桑林禱聖主方惕勵明廷戒臣工

獄理冤滯微官亦何為展轉勞夢寐端居愧素餐奮迅  
嫌出位憂心劇憊焚中熱不可制區區一寸丹耿耿天  
下計誰將天瓢水極力起涸瘁西成未愆期及此百物  
遂雲漢且勿歌豐年頌當製

困暑次韻白洲

高堂遞晴陰炎熇氣呼闔燔同洪爐然溽入厚地黯繁  
星夜方搖淫雨晝仍濫炎光石成焦暝色山帶靄羲輪  
燄赫赫雷轂聲輾輾龜拆行在田濤翻坐平檻占風想

乾鵲吠日驚蜀獮彼浴空羨鳬吾冠不如蜚甘泉冷將  
濯惡木繁可斬愔心甘獨勞炙手竟誰犯周扇懷仁風  
陶窓仰清範雖無簿書煩頗覺食食減顰為窮兒愁怒  
作壯士喊亦有歲寒交緜袍義思范豈無雪夜訪杯酒  
情意湛天時手中環世事波上艦晚尋東籬菊秋種南  
山躡思君正執熱有袂不可摻

春草圖為黎本端作

出郭登平岡東原土新沃濃烟開萋迷見此千里綠繁

紆綠長隄葱蒨滿幽谷芳情競為榮遠意如有屬時光  
迭代謝物理相剝復屈子騷莫陳江淹賦誰續吾人荆  
楚秀舊住東山麓娟娟名家子被服蘭與玉君無植桃  
李桃李眩我目君無踐荆棘荆棘傷我足眷茲君子心  
風薰雨為沐培根去蕪穢及此繼芳躅

送孔憲副公鏞之廣東

孔君本書生領職在方憲置身嶺海間越絕遠侯甸維  
時實多警盜賊滿州縣蛇吞與豕齧道路血相濺被圍

在空城百里無一援忠義激肝腸身微命如綫檄同巴  
蜀諭騎比汾陽見一言關福禍凶黨皆革面終焉抱勞  
謙功成不自銜銓曹守常格誰復論最殿山川接東廣  
民俗固所便重任須老成君才久諳練揚清激其濁坐  
使南溟奠衆力苦莫支知君有餘羨昔逢劉職方開口  
不容先復有太史吳作詩如作傳王事誠獨賢愧子長  
筆硯誰云識君晚猶及都門餞

問津圖

周道失其砥多岐正紛紜皇皇乘桴意環轍何殷勤迷  
路入楚蔡停車問耕耘問沮沮不語問溺溺不云方將  
騁雄辯上可凌高雲遂令仲由勇逸氣摧三軍夫子憮  
然歎彼狂竟不聞豈知聖人志一飯不忘君民胞物我  
與鳥獸非吾羣寧同辟世士高舉懷清芬時哉聖不偶  
萬古遺斯文彼耕獨何為幸免汙塵氛嗟嗟功名輩耽  
嗜成酣醺吾官亦食素愧此心如焚惟賢古希聖老大  
窮朝曠吾津在洙泗敢謂茫無垠

體齋止酒用陶韻因疊韻問之

昔予病止詩病頗為詩止君今病止酒此病相表裏君  
嘗勸我詩我以止報子欣聞覆杯戒及此勿藥喜詩魔  
固難伏酒興亦易起吾從止詩法深悟酒中理釁端或  
由人君意方罪已力絕非世情德將斯善矣病源今始  
塞慎勿問其溪請書止酒詩永作刑牲祀

送徐用和之鎮原

惻惻重惻惻與君各南北昔作同心人今為遠行客燕



山望秦關道路修且棘平生舊驄馬十步九歇側長風  
吹征衣黯淡塵土色莽莽天地間胡為此行役功名豈  
不念所志在憂國此意良獨知多言竟奚益

借扇一首戲書方石扇還之

借扇不必佳所貴在及時鬱然暑溽際愛此風披披我  
豈乏此物篋笥偶不隨中流一失船萬斛將奚為古人  
忍凍死不恨囊無衣暑豈不可忍憐君非挺之我當還  
君扇君當還我詩我詩若不還卻問借者誰

送成憲教諭

駐屐登崑山移舟汎秀水依依向雲樹戀戀別桑梓風  
物藹宜人方言猶在耳青氊本舊業仕路得新軌置身  
名教間寄興絃歌裏所得良亦多吾生聊復爾誰哉功  
名輩隴蜀方未已

董尚矩以畫禽索詩留予家閱月間假予所持  
倭扇意若欲相易者既而返扇索畫則贗扇也  
予既失扇又不敢留畫其計甚拙因憶坡老與

王晉卿以仇池石易韓幹馬事頗相類竊步其韻一篇題于軸而并歸之

雨霽開新圖幽禽滿庭綠天機自流轉俯仰萬態足或  
鳴高其吭或啄擁其腹前軒羨抑揚後穉憐局蹙塵心  
謝樊籠野性逐耕牧遠睇回青霄英風起川瀆董君好  
事者愛畫比珠玉而我非詩雄因君愧雌伏且留西閣  
賞終擬東鄰卜許田及秦地魯趙空馳逐吾家鳳尾扇  
渡海自暘谷知君能掌心二物皆所欲吾方混真質寧

敢論直曲卻笑王右軍籠鶩何太速

懷麓堂集卷五

欽定四庫全書

懷麓堂集卷六

明 李東陽 撰

詩稿六

五言古詩

家君以詩戒夜歸因用陶韻自止

辛丑十二月望日

吾生苦多欲有戒方一止胡為省身戒又落多言裏古人不遠遊此義聞孔子又聞父母年可懼復可喜向來

風雪夜偶闕問居起嚴訓當過庭微辭有深理為憐僮  
僕勞當以人視已仁哉長者言為利斯溥矣內觀恒惕  
若若在深淵渙朝出暮必歸盟言自今祀

墨菊二首

白露被原隰黃菊秋始花餘馨引遙袂采掇初還家秀  
色雖可玩玩久不復華入畫清且古為詩正而葩幽懷  
託揮寫庶用傳無涯持此問真幻無言空自嗟

其二

畫菊不畫香香空詎堪掬畫菊不畫色色似花已俗都  
無色香在安用此為菊登堂見孤標入手疑可觸自非  
識菊者但看桃李足古色今不知世人空有目

### 畫雞

秋稼已登場黃雞俛而啄縱縱拂毛羽縷縷不厭數安  
棲謝樊籠遺哺及雛穀時哉適所性宛轉如有覺高鳴  
或自振恥此弄咿喔主人重恩義至死懷一握祿食爾  
不如巢居愧羣齷

題邵翁碁墅卷

奕棋雖細事可以觀小德非無勝負爭亦足高曲直胡  
為紛紛者簞豆不掩色雄夸每絕叫巧伺或深匿不然  
出忿語與此同一格寄言同浴人慎勿譏裸裼賢哉東  
陵老愛此時自適指麾兒子輩已足支大敵旁觀但坐  
嘯信手聊戲劇安得從之遊清談澹終夕能令夸者默  
亦使忿者釋我語君不聞神交向空寂

送喬生宇歸樂平



我友中書君十年抗師席當時門下士往往繼科籍喬  
生西南來疎如木初植良材就斤斧規矩應丈尺文場  
纔弱冠已破萬人敵而猶不自滿歆若字未識竭來過  
我堂每語終日夕談詩辨格律論字窮點畫微言析豪  
芒獨詣超畛域紛紛科舉徒未暇論與策古文時所棄  
似子寧易得吾生好講學久矣抱深默愛子方起予胡  
為重行役勗哉千里途及此分陰惜少年豈可恃我已  
非白晢文章未足論太上貴立德而師有嚴規我語贅

何益

題章元益愛菊亭卷

種花不種菊物玩志不持學詩不學陶雖工亦奚為隱  
者丘壑情幽芳冰雪姿陶翁昔愛菊此興固其宜章君  
本宦達斂跡東江湄林居絕衆卉愛此黃蕚麤居與花  
為鄰行以畫自隨飄搖比風外嘯咏南山詩南山何崔  
嵬下有荆棘枝棘多損我花路遠勞我思何當薙荒穢  
永興塵埃辭茲願必終遂坐待秋風時

賀鼎儀遷諭德得檢字

華蓋天穹崇青宮地深儼同時侍從臣一一皆妙選陸  
君偉文行不抗亦不謫銛如囊中錐穎脫不受掩年勞  
秩屢遷德諭官曷忝名厖黼宸記薦豈公卿刻平生耐  
官職寵極翻自斂須知啓沃功不獨事編檢姓字符鼎  
彝文章歸琬琰非才獨慙予同第名久玷交游二十年  
道義足薰染攀躋竟何能時歲驚荏苒勲業乃攸期榮  
光詎相艷努力當壯齡時哉此其漸

鏡川先生宅賞白牡丹得白字

玉堂天上清玉版天下白幸從清切地見此純正色露  
苞春始凝脂萼曉新坼檀深藹薰心絳淺微近積終焉  
保貞素不浣脂與澤先生無物玩聊以物自適澹哉君  
子懷富貴安可易臨軒撫流景愛此不忍摘我亦惜春  
心逢花作花客先生顧客笑偶此非宿昔客去花未闌  
嫣然共今夕

藤蓑次陳公父韻

采藤復采藤日夕費斤斧製為身上蓑人古衣亦古借  
問製者誰白沙乃蓑祖冉冉綠蓑衣蕭蕭白沙渚披蓑  
向江水顧影還獨語愛此勿輕捐春江正多雨

其二

披蓑登前岡欲往藤被嶺新梢拂舊蓑膠結不復整自  
笑林下陰不如波中影

送楊應寧三首

我馬識君門每過還自止宦途亦多岐所識能有幾朝

遊樂方劇幕別情未已平生道義交豈獨愛文史此別  
良獨難黯然而已矣

其二

君年十三四蚤以奇童稱奉詔入翰林時人羨登瀛甲  
第豈不貴中書地亦清終為遺珠歎不使四海驚我年  
雖稍長學業竟何成送君滄江去江樹遠含情

其三

君本滇陽人還生嶺南地巴陵非故鄉京口亦何意莫

問東西蹤浮生本如寄松楸翳成陰桑梓鬱交翠所至  
各縈懷功名勿留滯吾生半南北歸與子同計舊業空  
衡湘僑居託幽薊向來金陵路展轉勞夢寐造物不我  
仇卜鄰願當遂此意君獨知吾言諒非戲

寄王丹徒公濟二首

我昔覽京口遙登浮玉峯江山偉形觀遠睇開塵蒙時  
無故人在獨往遺形蹤別來十五年我友遊江東同心  
不相值跡與參商同君今領民社王事方在躬寧能縱

耳目或可披心胃幽懷倘予憶願寄南歸鴻

其二

美人別我來贈我冰絲絃絃直似君操絃清似君言一  
彈不成調再鼓不成歡舊曲不復記離愁莽無端山高  
水復遠君去何時還我琴不必工雖工向誰彈古人知  
音少今人知音難

不寐

遙夜耿無寐悠悠對青燈幽懷不盈掬縷結如春繩垂



髻弄柔翰濫采世上聲弱歲忝科籍冠簪奉明廷生平  
四十載鬢髮白幾莖豈不愧竊祿日給粟數升惟餘素  
心在不與炎涼更營營彼何物集我垣西庭沾我白苧  
裳浣我素玉屏城狐不敢問市虎難為櫻塗人勿復道  
知者已復驚曾參豈殺人不疑本無兄內省寔自疚人  
尤竟誰能不聞謗貪者足浼夷齊清古人重不辯辯極  
翻益增志士恥苟免壯夫想孤征擬尋江湖興未結松  
筠盟故國隔湘水舊遊在金陵茲謀苦不遂鬱鬱竟何

成誓存操修節謹獨戒未萌閉門索古義著書見高情  
著鞭讓祖生割席效管寧從此畢餘志垂休俟千齡

痛語一首柬南屏

砭烙攻微痼力與疾相關燔焚勢不已百節皆為動右  
臂鍼獨多腕腫逾負重左肢豈解事匙粥不自送我病  
亦偶然星火忽已烘古人戒謹疾我豈敢為縱蒼黃苦  
塊身六氣為一中因循積年載展轉驚寐夢瞋眩疾乃  
瘳茲言夙攸誦刮骨彼何雄滯腸或非惜我計決恐遲

醫謀固常用聊輕筋骸困坐待膿血漣痛癢方自知胞  
哉幾人共平生骨肉交思君令人痛竭采慰藉情款語  
得深奉寧知君歸後獨樂不及衆西郊昨夜雨不解憂  
懷壅悵望君不來悲歌當予慟

篁墩所藏賓頭盧說法圖

釋有賓頭盧長者映頭白偶逢優填王說法示生寂譬  
如野行者為彼獬象迫俯身入深井下有龍蛇宅援藤  
上高樹上有二鼠齧野火燔其根根裊不自植事幾出

倉猝生死寄頃刻忽有羣蜂來芳馨不盈滴六根與四大纏繫誰為釋欲問有生人胡能隱身跡人生所遭異一樂恒患百吾儒實順受此輩方巧匿先生兩道眼夷險同一格獨念居安徒思危乃良策聊為發竒難使自圖畫得我鈍落鋒機欲語翻自默嗤彼畫中人何如點頭石

問白髭

毛髮有白黑遲速亦有時我年四十強誰遣白我髭謂

予夙多病或者煩憂思髭生本髮類我髮胡未知人言  
白可拔拔白將何為或言黑可返借問返者誰髭乎苟  
能言聊以解我頤

代髭答

託質向君身稀微愧毛髮於身百無濟況乃貽玷缺憂  
病君自知敢以諛累哲君髮豈不華幸遠不近瞥後生  
能幾何壯老真倏忽白拔祇自欺黑返竟何悅多言亦  
安用勿謂髭也叻

問白髮用髭韻

我生汝本黑汝白從何時汝長亦已白何得短彼髭髭  
白汝豈黑嗟我獨不思三年不對鏡縱白安得知訐言  
信有之髭豈誑我為髭白汝亦白黑者尚有誰豈我弗  
汝養靜言觀我頤

代髮答

君身鬚眉具鬣者寧獨髮髮也幸獨長雖長亦同缺壯  
老信有端知幾乃明哲汝德不益增我衰豈終瞥習變

如我然繁多起絲忽汝躬不內顧顧以容為悅我意君  
不知茲言我當啞

植柘陳翁剗股卷

伐樹勿伐柘愛此手澤存爪樹傷柘膚鋤樹傷柘根根  
膚尚可惜戕肌亦何人吾肌本親遺吾以奉吾親茫茫  
堪輿內此意誠苦辛肌戕幸不死遺膚終兒孫孫乎慎  
無忘錫類良有因

洗句亭

洗句復洗句洗句先洗心心清絕塵滓句清無哇淫洗  
句尚可淺洗心須用深所用有深淺水哉何古今有句  
莫太清太清寡知音知音苦不遇獨和滄浪吟

送王存敬秋官知興化得但字

王君東南豪才氣絕軀幹一經重賢科百里見雄斷西  
曹美風裁而復愛文翰還操老吏筆卻判詩家案入朝  
更出守恩詔何渙汗莆陽亦名邦金紫蔚相爛清風散  
塵歔好雨知歲旱勲名竟當成軻發此何但吾翁蒙泉



老遺跡猶可按謗言昔徒興白黑久乃判古來經濟士  
不受羣疑絆送子獨含情臨風幾長歎

登高二首次韻答錢與謙狀元

莫居丘垤地為學如為山望道如望海莫近汙潢灣吾  
生好求士意欲窮區寰有津孰與航有磴孰與攀行矣  
幸勿疑勗哉山海間

翰林神仙窟鼇峯出瀛海天低衆山伏地合羣流匯恩  
寵絕代殊榮光有時改許身德義重華國文章在行且

懼吾衰君名世方采

方石惠貓忽被踏以死悼而賦之

懸燈直廬夜見此狸奴羣主人愛狸甚指點向客云西  
鄰乞狸母乳孳當深春我本無長物但令守典墳客意  
不忍奪念為主所珍主人忽南徙書擔愁紛紜居然棄  
其餘一尾幸見分人苦不知足既得擇愈勤色純足貴  
屈此法舊所因攜歸雪照眼兒女爭歡欣先防老狸欺  
更避惡犬狴丁寧戒婢僕為我謹朝暉寧知不旋踵步

履生艱屯蒼黃不能抹吊歎若有聞孰謂方寸靈不如  
趾在麟嗟嗟放麋子此意實近真吾方為鼠厄誓欲策  
狸勲貪功信多悔縱暴亦非仁彼鼠固無恙爾狸竟委  
身悲哉勿復棄葬之我竹根竹非利汝死庶免烏鳶鄰  
猶感贈狸意賦詩謝主人

題蘭為司寇何公

楚澤有幽蘭名高百花選孤根託地靈芳心應時展陽  
和一披拂春色無深淺清風徧六合孰謂知者鮮援琴

思昔人古意嗟已緬層厓數枝竹意若相慰勉穠華須  
卻避荆棘行當翦幸此挹餘芬披圖漫舒卷

送楊應寧提學之陝西三首

君來幾日前屈指算君程君行幾日前使我夢先驚問  
君孰為來問君孰為行倉皇六載間展轉萬事并欲語  
不得盡欲別難為情

君從滇南遊意不在金寶歸裝詩篇富遠目江山飽遺  
蹤念丘墟舊事懷父老重惟宗祧計擇後良亦早達能

洞大觀孝足慰昭考之子瑤瑜姿兼聞嗜文藻愛之不  
可見見彼昆弟好通家情所關茲事況不小願君自珍  
惜遠向風霜道

江南形勝地可游亦可居君居僅六載乃有田有廬種  
苴晚成筍買秧秋作魚官程正發輒歸計已有餘君行  
世所重君才此方於試看一家業經濟我不如不如南  
官去衣冠就樵漁有興苦未遂送君意踟躕

泰和羅氏家傳四圖詩

羅氏五世祖宋荏平簿伯壽嘗封股愈母疾有  
司表其所居坊曰旌孝坊在縣東百步許圖曰  
純孝

旌門自何年宋朝南渡後借問旌者誰縣東羅伯壽憶  
當封股時見母不自揀本無營利心誰遣為名賢皇天  
有錫類遺體神所佑五世旌賢科貽謀竟堂構卓哉孝  
子家永為忠臣胄

羅曾祖諱理為德安同知有巨盜糟李捕弗獲

逮者數百人縱使禽賊皆願盡力遂獲糴李治  
園得鐵數萬斤會徵鐵令下悉出以代民輸圖  
曰德政

德安古良吏佐郡功可錄縱囚得真盜縲紲無留獄有  
如釋李祐元濟終就戮掘地見黑金有利不思鬻吾心  
幸無染民稅亦以足歆揮竟何事產濟非我欲由來重  
官評寧止範鄉曲文貞作家傳雅操比冰玉冰玉有遺  
風聞孫繼芳躅

羅祖母周寡于西安之戍楊文貞公言于仁廟  
而釋之周攜稚子走金陵謝文貞歸不失節以  
死文貞亟稱曰賢圖曰貞節

盤盤九折坂妾行日苦遠妾歸夫不歸不恨歸時晚感  
茲君恩重惜彼去日短攜家渡江水骨肉不在眼不有  
文貞公賢哉竟誰嘆

羅公諱善進少在文貞門有贈墨者視之則金  
也遂還之文貞以是重公圖曰卻墨



魏魏揚公門揭揭羅氏子客來公不見見子斯可矣位  
墨黃金胎有客為子遺揮之不肯受客媿公獨喜童子  
亦何知知公四知裔異姓本通家誨穀乃相似何以紹  
遺休公孫賢太史

寄李知縣遂之

歲晏朔風厲河水載行車之子東南征前路阻且紆攜  
家住灣北旅泊非寧居開門掃殘雪閉門讀古書書生  
慎窮達壯士惜居諸百里多貧民隆冬尚無儲向來噓

呵力力盡意有餘離心繫孤掉遠信回雙魚時哉戒春  
發無為重踟躕

聞方石先生得遺腹孫

故人喪愛子棄官歸故園空懷向平念誰候柴桑門吾  
心怛如割匪獨傷弟昆竭逢舊台守達致州人言言從  
抵家後乃得遺腹孫素辭簿書勞辦此鞠育恩奇事諒  
非偶善徵詎無根綿綿千鈞力耿耿一髮存天乎豈無  
知可與知者論詩成不寄達庶以紓吾煩

題畫

騎驢下前坂山深日將晚水石何蕭條風稀髮毛短秋  
聲在高樹歲去不復返遙指故人家松花夜當飯

送蔣宗儒良醫歸老

流雲遞晴陰飛雨忽而過黃塵暗西郊河水不滿枕言  
從北畿返遙憶東山卧未清炎暑懷且免泥塗浣兩枰  
萬事畢一酌千愁破平生醫國心少壯驚老大榮名方  
得謝餘寵猶在荷欲問滄浪歌歌成幾人和

兆先赴試三河念之有作

東行百里程送汝萬里心衣裝問寒煖野望疑晴陰汝  
生不離膝別我恐未禁翩然上馬去似有壯士襟髻巾  
能幾時忽已勝冠簪摘毫出組製把玩驚詞林嘶鳴誤  
一顧獎借踰千金不學是吾憂虛名非汝任古人重宅  
相派出蒙泉深南屏實衆望鬱鬱泰山岑汝師文場手  
奪錦春江潯蓬麻得依附玉石勞鐫鋟遭逢我弗逮天  
意或在今求論目前事長途尚駸駸貧餘詩書在老覺

歲月侵汝幸慰我意我方為汝箴嬰懷繼日夕屈指經  
辛壬遄歸一見面誦我東行吟

淮海遊

愚樂傳公嘗遊淮海間士大夫贈詩成卷為補  
是詩

汎彼江湖興來為淮海遊高帆駕巨浪浩蕩空中浮上  
有盪胸雲下有濯足流吹簫動海月鼓柁驚沙鷗長歌  
振林木逸響歸滄洲至今淮上人髣髴疑仙舟懷賢託

楚些感舊聞吳謳寧無後來者俛仰難為儔

閏月對菊

五月復五月六月行復來一雨滌炎燬再雨清塵埃茲  
晨忽如注墮溜鳴空堦回風坐飄颻巾袂相徘徊冰絃  
濕不彈叢帙委不開孤吟答幽響爽思凌飛臺昔人有  
深慮道暘思黃梅淹留幸未晚物意回枯荻君看古牆  
背已見青莓苔

主一齋為徐都憲公肅賦

世途日紛錯應變良獨勞有政如繭絲有法如牛毛矧  
惟跬步間出入亦異遭向非定靜功多言竟呶呶君子  
慎存省一敬中自操物情詎我奪帝鑒焉能逃執虛手  
恒盈踏險腳益牢靜觀紀昌射動鼓庖丁刀言小足喻  
大行卑乃登高聖途可方軌有轍誰當膏

徐亞卿原一六十二得雙生戲東一首

澄澄嚴江波混混入東海雙雙出明珠煌煌弄光彩聲  
聲識英物表表見神采遙遙徐卿胄衮衮靈源在茫茫

堪與間物物任真宰奇奇觀茲事嘖嘖爭歎駭看看頭  
角露忽忽望改望望湯餅筵徐徐欲安待

送錢與謙修撰

與子論文章汭流自前古莊騷信枝葉經傳乃宗祖當  
其得意時入口辨甘苦又如色過目白黑粲可數刻鏤  
恥雕龍炳蔚驚變虎與子談道義培根去榛莽孤懸見  
衡鑑險設謝城府予心諒子知子志必予吐嗟哉勢利  
徒各自傾肝腑與子談世故今昔同仰俯悲歡動相涉



成敗時逆觀賓筵每更僕朝坐常及午堂升詎無因鄰  
卜固其所依依別我去道路忽修阻振衣千仞外艤櫂  
三江潯汝親並白頭汝弟方接武歸承聖主詔拜學嬌  
兒舞此樂須盛年誰云守環堵古人稱仕學進盡還退  
補登山航海心有力竟思努愛子千金軀深藏是良賈

采桑玉堂陰二首答篁墩學士

采桑玉堂陰分蠶長安郭一勞累百枚再分連數箔寧  
知貴富地此物能沃若平生猷畝憂黽勉懷力作嗟彼

衣錦兒空言養蠶樂吳機詠濯濯周葉歌莫莫遺我通  
家人同心故相託愛之敢輕棄弱女方就學

其二

采桑玉堂陰陰濃樹婆娑一采不滿筐竟日能幾何乃  
知富貴地不及窮山阿蠶成忽滿眼所得良亦多人言  
繫家運或者陰陽和向非夙夜勤豈恃葉與柯衣多必  
思寒吾民本同科欲將分蠶意廣被無偏頗

懷麓堂集卷六

欽定四庫全書

懷麓堂集卷七

明 李東陽 撰

詩稿七

七言古詩

平陰武愍王輓詩

十有四年秋八月胡笳吹塵暗城闕漢家天子親出師  
旌旗如山令不發將軍意氣如飛熊腰間寶劍雙白虹

長戈一麾四十萬六合慘澹多悲風胡天冥冥夜飛雪  
將軍奮呼山石裂平生鐵石舊肝腸化作烏鳶口中血  
君王龍馭今在途臣身已死誰為扶中興功業吾豈敢  
君王獨歸臣不返裕陵松柏自千年臣歸祔葬橋山邊  
英魂或助天飈起長為狼山掃夕烟

送金太守致仕

北風蕭蕭起平陸遠客還思舊鄉曲青袍白馬送君歸  
楚水吳山為誰綠當年獻策來京華飄飄意氣凌雲霞

曉日長趨九華殿春風爛醉五侯家雙旌照人日杲杲  
承恩獨出長安道西江稚子解絃歌南國騷人怨芳草  
退身不待衰病年懸珂結駟空留連三山松栢宛然在  
五陵桃花亦可憐山中寥寥何所有萸菜羹蕪菊花酒  
相如膝上七絃琴元亮宅邊五株柳清時令子居黃門  
門前冠蓋如雲屯功名去住總適意此樂悠悠安可論

赤壁圖歌

荊州水軍八十萬鼓櫓揚旗下江漢江東將帥誰敢當

年少周瑜獨輕難漢家英雄本龍種怒指中原扼雙腕  
孔明決策討操逆誓復深仇起相扞東風吹沙暗赤壁  
百里旌旗眼中亂列炬爭馳疾若星南軍已在中流半  
黃郎大呼老瞞走烏鵲翻飛過江岸攀緣失手勢兩孤  
一紙軍書萬人散賊兵未平壯士死猜疑已作蕭牆患  
脣亡齒寒不自知可惜衣冠盡塗炭乾坤無情歲月改  
千古茲山石不爛東坡老翁好奇古一官遠向黃州竄  
簫聲入秋木葉空此地經過獨腸斷高歌扣舷和者誰

回首斯人亦凋換  
姦雄僭竊何足數  
青史離離後人看  
為君擊節歌此圖  
卻立蒼茫倚長歎

庚寅夏苦雨答鳴治長句

驚雷破樹雲出山  
急雨墮地流潺湲  
爾來一月未斷絕  
行路危塞往復還  
官隍朝決朝陽關  
野渚夜漲張家灣  
邊河人家數千口  
骨肉漂蕩隨枯管  
居人乘舟走平陸  
船底秫苗俯可攀  
城中溝渠失疏導  
街頭結筏通市關  
東鄰嫠婦抱兒泣  
西家老翁窮且鰥  
升求斗糴典衣盡

有物何況珥與鐸君王惻惻念孤嫠賑粟屢自公家頒  
故老相傳乃舊典先朝以來幸未刪翰林腐生詩骨孱  
城南敝屋堵不環劇遭委頓怕泥滓十日不造承明班  
因思春夏久枯旱後何冗濫前何慳甲兵未見洗幽朔  
流移直恐窮荆蠻吾曹謝公有深慮向來憂國髮欲斑  
揮毫作歌意慷慨直欲廣厦千萬間朝廷有道弭災沴  
胡不浩蕩開愁顏

沈刑部所藏墨竹歌



沈郎之貌古不妍滿懷清思如湧泉手中墨竹風娟娟  
坐我一片瀟湘天貪愁吟髮灑霜雪已覺紗帽隨風偏  
人道湘靈解鼓瑟此中似有冷冷絃自言得此意蕭索  
中夜不敢高堂眠問誰作者夏太常平生翰墨江海傳  
雪堂無人老可死此物價重黃金錢近來畫竹有數家  
世人皆愛我不憐我非能畫卻能看別有苦思通幽玄  
病眼揮毫不成字小者如粟大者拳西鄰奚老髮半白  
東鄰陸郎美少年清歌苦調兩不厭為子和我滄浪篇

周少卿雙壽堂

周郎豪宕老不狂近來好事爾擅場全家舊住西湖口  
甲第新開雙闕傍高車駟馬通晝夜墨客騷人爭短長  
阿翁堂東母西坐面如紅玉頭比霜十日摧詩八九至  
一盃獻壽百千強御璽重封五花誥大官屢出九霞觴  
紗帽輕籠夏陰薄翠羽將動秋風涼短簫大鼓聲動地  
吳曲越吟歌繞梁浮雲欲度不肯度落日半落還低昂  
曲廊烟霧散復合舞袖風花抑更揚花底番番喚綠酒

燈前隊隊出紅妝金波玉繩耿不定樓箭宮壺殊未央  
共說神仙隔風雨豈知塵世有滄桑西池王母誰曾見  
南極老人空壽昌眼前相對且為樂世事悠悠安可量

歌風臺送李舍人

芒碭龍氣去復來長風萬里黃雲開手提三尺視六合  
酒酣獨上歌風臺大風之歌何壯哉樽前灑淚數行下  
當時聽者翻悲哀沛中小兒解擊鼓不見干戈見歌舞  
三戶丘墟已滅秦兩生制作空逃魯君王自信材且武

衣冠士人棄如土大風之歌竟何補李侯自是江東儒  
壯年挾策事明主平生慷慨心好古亦欲南遊吊徐楚  
是時朝多賢俊臣坐令四海無兵塵禮樂成俗忠孝敦  
君亦還家懷老親君歸試問荆與榛豈無儒碩遭沈淪  
丈夫勲業共努力君今豈是江湖人

題陳考功所藏山水圖

我昔南遊向南國輕舟浩蕩隨所適雨纜朝辭楚岸沙  
風帆遠挂吳山色毘陵城東好山水平湖方田渺蕭瑟

錫山惠峯俱在眼  
舟人野夫相與識  
谷口浮雲乍有無  
林間細路仍荆棘  
錫山李侯邀我遊  
此興豈待相促迫  
是時江湖足風雨  
城郭半化為溝洫  
苔深石滑苦不支  
屐倒筇顛正愁劇  
匆匆揮手謝使去  
還家仰天空歎息  
向來經過信偶爾  
岳麓險絕西湖僻  
寧知咫尺不相遭  
恐是山靈闕題籍  
潦倒誰開摩詰圖  
依稀尚有元龍宅  
元龍舊是湖海豪  
作官十年歸未得  
揮毫賦詩本無意  
況我與子同宿昔  
炎天倦眼藉披豁  
從事索詩如傳驛

卻恐詩成卷送還高堂素壁空相憶

深宮美人圖

秦宮丘墟漢宮圯望仙銅雀參差起隋唐去後花綺空  
流落誰家畫圖裏桂殿椒堂十里香繡襦寶帶鬪成妝  
前庭歌聲後庭舞鳳輦不來深夜長玉甌犀筋涼風發  
團扇空悲舊時月不見千門萬戶時祇今何處埋香骨  
馬家大練長作裙沈香錦鞵隨風塵君看掩鼻工讒者  
何似辭恩下輦人

畫松為顧良弼主事題

畫松不必真似松風骨畧與畫馬同畢宏曹霸兩奇絕  
妙意正在阿堵中君家素壁光如雪上有虬枝老垂鐵  
晚歲長同怪石寒炎天恥受高雲熱江翻樹轉爭喧逐  
十步九戰何時開陰房半局山鬼嘯海水不斷天風來  
城南野人頗醇古坐受涼秋滿虛宇安得移來十丈青  
高價如山棄如土知君此興迴莫攀謂予苦絆風塵間  
攜琴載鶴招使去我家自有徂徠山

送武昌徐翁南歸

翁行人鏞之父也

黃鶴磯頭秋草色  
高樓四面青山碧  
我來君去兩浮萍  
忽漫相逢更南北  
君家舊在江城居  
白頭紗帽隨巾車  
作客聊同薊門雁  
還家應憶武昌魚  
蘭橈桂櫂日將晚  
斗酒放歌情未疎  
杜甫不堪垂老別  
嵇康曾著絕交書  
徐卿有子吾所羨  
騎馬題詩曲江宴  
賦終奏入明光宮  
詔成捧下麒麟殿  
青雲於我最交親  
況復山川是舊鄰  
送君此去情無限  
綠樹猿啼湘水春



林良雙鵲圖為通政程公作

華堂繡幕雙雕櫳樹間靈鵲穿璫瓏當春解識芳菲意  
鎮日相呼樓閣風疎枝密葉開復歇曲檻叢臺西忽東  
共愛羽毛爭洗濯由來律呂自諧同此時閉戶填青蔥  
昨日天書下紫宮已喜西州金印大何如南海畫圖工  
開筵置酒賓燕喜愛畫索詩公意濃卻愧當年賦鸚鵡  
氣酣捉筆如飛鴻

江風圖為劉太僕二丈題

寒空木落江呼洶疊浪如山亂堆壘雲拖雨腳隨長流  
萬里蛟龍作人踊獨有一葉之扁舟舵側帆歌未肯休  
頽洲斷岸地飢艤遠樹絕島天沈浮眼前萬象錯恍惚  
倉卒遇之寧暇求由來適意在頃刻此外豈復千金謀  
南人使船如使馬夢落江湖若飄瓦君看白首波濤中  
笑殺磯頭釣魚者高堂慘澹開丹青坐見四壁皆滄溟  
酒酣擊節歌不成感慨忽與歡娛并昔公江漢初揚舲  
亦如湘纍浮洞庭一朝奮起在平地健翮上可凌高冥

謝安尚憶中流坐  
師德何妨逆浪行  
向來夷險竟何物  
世間萬事如浮萍

題邵容城所藏畫松圖

種松谿邊長十丈  
高雲對屋團青障  
中有幽人愛讀書  
亭袍紗帽秋蕭爽  
青苔白石坐移時  
衡門晏起獨開遲  
山中繁實雨初落  
水面垂蘿風倒吹  
十年南北江湖夢  
野樹孤雲遞迎送  
此地材同新甫良  
多君官比藍田重  
酌君美酒聽我歌  
東園桃花能幾何  
丈夫功業在晚節

君今尚壯非蹉跎

張御史洪死土木之難其子浙江叅議敷華請  
為詩以輓之

平城敵騎紛騰薄大駕親征向沙漠漢家將軍令不專  
四十萬人俱不還百官扈從爭赴死玉佩金章者誰子  
道傍白骨無人收中有豸冠張御史張公直筆橫秋霜  
平生鐵石為肝腸長軀七尺棄如屣赤日下照雙瞳光  
山間野狐猶陸梁願為厲鬼隨君王君王入朝臣恥雪

驍帥戕軀強敵滅羣公坐饗升平年恨不生持子卿節  
公今有子登金門九原再拜君王恩十年兵甲不復試  
兩世箕裘今尚存相逢若問公家世莫話龍沙舊時事  
仰天不獨悲賢豪一曲哀歌幾行淚

送沈仲威之南京兵部兼憶乃兄仲律僉憲東  
計刑部汝和吳屯田元玉

昔年我在金陵城捨舟躍馬長安行大江為隍石為郭  
天地設險通神靈闕庭巍巍擁臺署館舍濟濟羅賢英

朱樓畫棟連飛甍六街三市分縱橫琳宮寶地不知數  
復有金碧摩崢嶸雞鳴山頭海色動雨花臺前芳草平  
是時同遊盡豪俊元方最有能詩名賦詩載酒樂未已  
長揖遂作西南征君今作官向南署予亦歸來幾寒暑  
壯心廓落江海空目斷雙鴻欲飛去羨君生長在茲地  
山水還經舊時路好事真成太史遊多才不恥班生賦  
錦袍紗帽坐看書官清地切兵曹居中宵或有彭城夢  
暇日自引河陽車我家北都官北闕未免塵滓隨簪裾

人生離合類萍梗因君感舊重鬱紆浮梁醉客久不見  
青龍山人音問疎二君詞畫吾所愛憶我為寄江南圖

早朝遇雨道中即事

長安五月霖雨多六月更急如翻河通宵到晚不得寐  
茆屋欲破愁嵯峨攬衣當戶未能出卻坐蓬窓聽疎密  
縱道君恩屢放朝端居未敢忘巾櫛九衢燈火迷西東  
輕蓑瘦馬隨疲童道傍行子顧且笑謂予亦在泥塗中  
感渠相念不相識問之不答還匆匆如聞身是營中卒

畚鍤欲赴朝天宮古來王事稱靡盬予亦勤勞竟何補  
為渠慚愧久低回雨急嚴城聽鳴鼓

荷鷺圖為薛御史作

秋山沈寥秋水闊一夜天風起蘋末萬籟凋餘錦樹空  
繁花落盡紅衣脫鵓鵲鷺鷥俱無聲沙邊白鷺如有情  
幽禽相呼落日暝尺鯉下避寒潭清寒潭直下幾千尺  
落羽回波共蕭瑟獨立遙憐海嶼青低飛不礙江雲白  
詩家畫格還相宜卻憶江南初見時雍陶池上風雨集



摩詰田中烟火遲吾生頗似巢籠鳥十年塵土長安道  
萬里滄浪一片秋安得閒身此中老

張養正檢討所藏王舜耕雪圖

朔風撼山山石裂老樹杈枒半枯折陰雲匝地凍不收知  
是前溪夜來雪回峯遠岫相明滅斷梗流澌正幽咽天  
寒萬籟聲蕭蕭水行無舟陸無轍村回徑仄隨歌傾危  
橋欲墮猶低撐長空遙遙一雁下白屋裊裊孤烟生灞  
陵豪客一時興東郭幽人千古情高堂對酒不得醉我

意豈獨憐丹青君不見去年三冬無一白又不見九月  
江南雪盈尺豐年消息定何如欲向田家問薤麥官曹  
坐食無良籌子亦胡為簪組流知君故是經濟器慷慨  
莫忘蒼生憂

破戒後明仲勸作詩韻

自別詞林老冰玉

明仲號

塵滿胸中數千斛忽傳健檄督

我詩我詩未成君累幅苦君相操如濕束強將冠屨加  
老禪頓使茹葷兼食肉平生此事性所好縱使戒心寧

戒目劉伶斷酒忍解醒虞七廢書猶畫腹羣公左袒纔

兩人後有修撰

鼎儀

前侍讀

舜咨

向來論議各反復老將深

機信神速始知詩酒非俗事詩亦可作酒可盡此語雖

佳恨不除

明仲詩有云飲酒作詩俱不俗

悔卻從前三月俗即當載酒

攜我詩來聽高談如炙轂

亨父以梅花扇寄其門人索賦一首

江頭古樹花滿株蟠虬屈鐵相縈紆微雲點綴不盈掬  
風格自與羣葩殊翰林老吏神仙骨揮毫兩袖清香發

空梁夜半酒醒時夢斷江南酒樓月仙郎瀟灑如宗之  
平生愛畫復愛詩山高水闊望不見瓊林玉樹空參差

謝學士所藏山水圖歌

翰林門地清於水高堂六月開雲汀涼秋撼撼起庭宇  
萬籟如在空中聽空山蒼蒼入林莽江上茆亭隔風雨  
層窓曲檻深閒寥寂寂幽絃似相語繩床棊几隨周旋  
塵尾不動聲琅然山高水闊鳥飛盡惟有碧樹鳴寒蟬  
東鄰老翁跨驢至西家屐齒半欲穿山頭荷擔步還卻

此豈有意冷冷絃先生愛山復愛水看畫題詩宛相似  
坐令賓主成三人不羨謫仙花月裏玉堂退食時相從  
恍然坐我青芙蓉願將一曲洗雙耳更待高樓闌闔風  
題朱儀中雪雨二圖

洛陽城中一丈雪洛陽先生被如鐵洛陽令尹呼始醒  
足不可出骨可折誰為此圖圖者誰深山日晏啓關遲  
呼童擁篲亦多事安用掃此門庭為前山無樵溪不釣  
獨坐空林發長嘯鴟鴞飽肉鷗鷺飢歲暮苦寒空自知

金匱要略卷七  
世人厭寒爭附熱此景蕭蕭向誰說炎涼翻覆如畫圖  
圖中之人今有無

菰叢蒼蒼集煙渚山頭濕雲半為雨垂蘿繞屋茅覆牆  
石燕林鳩似相語桃花落盡梅子黃南湖北渚俱茫茫  
黃泥道路白頭浪知是江南煙水鄉長安溽暑秋過半  
雨濕書牀盡糜爛三年詩逋坐盈案拂君畫圖為君歎  
閉門覓句無人催呼童卷送休徘徊君看白石最深處  
紙背猶濕青莓苔

鰻魚圖為掌教謝先生作

泮池雨過新水長江南鰻魚大如掌沙邊細荇時吐吞  
水底行雲遞來往其間種類多莫辨短者如鍼細如綫  
三年養得鱗甲成萬里空嗟畫圖見一官薊北後巴西  
丹青不改鬢成絲遙憐天路飛騰地長記春風長養時  
宦途萍水紛無迹再見此圖三歎息遠行珍重寄雙魚  
魚中定有長相憶

舜洛歸省尚書公餞者以韓昌黎送鄭校理詩

分韻予最後得廓字時呂中書秉之得洛黃鵠  
臚蘊和得閣邵戶部文敬得薄濮武庫用昭得  
泊俱同韻除互押外共得二十有六予詩後成  
凡諸君所用者皆不敢襲其韻數亦不敢獨減  
諸君獨廓字乃所分本韻雖已為戶部所押不  
復避也

贈君高歌罷君酌君行正懽予作惡憶年十五前識君  
我童始成君冠弱秋闈春榜俱少年愧有聲名比盧駱



石渠金馬高崔嵬壁彩奎光遞聯絡分班華蓋冠裾集  
賜坐彤墀杯俎錯南宮閱卷春持衡秘府藏書夜收鑰  
官雖異調偶同秩亦得隨君侍經幕朝遊暮燕無停時  
十日不見心已愕與君出入若蛩蹙將往復還如有約  
中間蹤跡頗乖隔君南歸吳我遊鄂同時豪俊八九人  
幾見參商互升落君今復駕滄江颿岐路未免東西各  
高門舊可容駟馬廣廈還聞賀羣雀紅脂臘酒醅正開  
白雪鮪魚膾新斫彩衣翩翩花婀娜酒酣戲舞欣欲躍

尚書老倦賓客勞起坐為君成矍鑠古人至樂在甘旨  
一日豈換三公爵知君此興歸正濃棄我別離如敝屣  
獨子疎蹇具百疾仰藉忠言比良藥壯夫恥作兒女顏  
能不感慨傷今昨君才磊落經濟資應讓祖鞭先我著  
宦途已作前輩行莫遣流光迅如燭遠行珍重勸加餐  
幸有長軀能大嚼情深義重出肝腑此語雖麓未為謔  
語闌呼酒重酌君百罰深杯勿辭虐長歌未終短篇續  
臨發更煩開一噓詩成酒盡君已遙獨望江天渺空廓

題陳考功所藏何太守山水圖

春雲巍巍山欲活沙明水清石可掇飛泉墮空紛濺沫  
長流赴耳聲淅淅畫手依稀入毫末妙思似恐詩人奪  
君看茆堂向空閣卷幔青山在窓闥中有一翁頭戴褐  
白髮蕭蕭短垂褐有魚旋烹醅旋醖誰與長年老蒿刺  
石橋雨過春泥澆山長水修去莫達溪邊小船輕比筏  
舟人不來費呼喝我懷若人心欲渴有奴當驅馬當秣  
慷慨不愛青袍脫高堂暫開神已豁坐對巉巖聳雙髻

吏人索詩方苦聒十日閒愁為君撥談笑頓解詩囊括  
興如長風駕巨艤韻險橫被狂流遏紙短詩長重刪撮  
潦倒卻恨并刀割

邵文敬所藏畫松圖

老榦叢枝色深黑蛟龍戰空雷雨擊空堂素壁光虛白  
望斷水崖雪千尺君家此圖圖者誰誰其似者畢與韋  
酒醒片石月欲墮坐久鳴濤風漸稀初如廬山尋白鶴  
不聞人聲聞子落復如駐馬藍田廳樹下或有吟哦聲

主人能暮復能賦倉卒相逢不知處嗟予亦是好奇人  
慣聽涼秋滿庭戶城南風景無塵埃東曹隱者心悠哉  
閉門卻掃戒僮僕莫效前呵喝道來

王祠祭希曾所藏汝和紅菊歌

世人作畫皆論派汝和畫菊乃天解直將書法寫此花  
宛轉金枝總垂薤初為水墨後紅紫幾向清纖發狂怪  
桃羞杏澀寧比妍蟻恨蜂愁未堪囁幽蘭堪供屈子佩  
奇石當邀米公拜當時落筆亦偶然忽有聲名起碑泮

僮奴塞戶卷委山不獨文逋與詩債有時偃蹇不受促  
怒目看人兩睚眦酒酣興發誰使顛迅掃但覺吳縑隘  
箇中三昧我獨知每見渠揮為渠快最是平生跌宕心  
病卧窮山老何憊南宮王君得此圖舊索遺紅未凋敗  
豈知一見已陳迹江水東流日西邁摩挲兩眼三歎息  
悔卻從前比管芥長安賈客君不聞已索黃金市中賣  
彭學士先生所藏劉進畫魚二首

魚為水族類最稠近時畫手安成劉生綃如雲筆如雨

恍惚變態不可求大者獨立為豪酋小者列從分奴騶  
翻身煦沫日弄影一一如在空中遊風翳霧鬣卷復散  
頃刻巨浪高山丘上摩虛無拂倒景下逐遠勢歸長流  
初疑聚石作九島咫尺之地皆汀洲又如然犀照牛渚  
海若露呌羣靈愁問渠類象誰指示或者神授非人謀  
畫圖貴似不必似卻恐有意傷雕鏤擬將天地作畫筭  
此語吾傳蘇子由江湖茫茫隔塵土吾欲遠掛珊瑚鉤  
臨淵之羨亦徒爾況乃物幻無停眸詩成日暮酒半醒

蕭蕭落木高堂秋

西園太液今靈沼山下碧波春渺渺紅鱗紫鬣時去來  
雲影烟光足昏曉微塵不生空宇闊百大秋毫差可了  
沙邊細沫吹轉回水面青蘋拂還繞窈窕遙憐宿鷺閒  
飛騰不羨輕鴻矯朝廷有道萬物遂池榭雖多幸遊少  
帝澤還同雨露深餘生得謝曾晨擾慈宮宴罷移彩舟  
學士詩成賜清醪羽林郎官亦供奉筆下丹青疾於鳥  
白玉堂中一尺白片月孤雲未為皎天上真傳種類奇



人間豈合泥塗湫十二闌干九曲堤置身忽在垂楊杪  
極知飛躍皆聖化摹寫無才愧荒眇他時變化那可期  
已覺神光射天表

王世賞所藏林良雙鳳圖

鳳凰何來自丹山一舉千仞不可攀鳴聲入雲光耀日  
倒影下墮蒼茫間梧桐作巢倚空碧俛首啄食青琅玕  
遂令三百六十種風翎露翼空闌珊虞廷周甸信烜赫  
魯門漢府皆虛譖九苞六象杳莫覩誰遣圖畫留人間

翰林王君好奇者家有丹青絕瀟灑巾藏篋裏二十年  
云是林良舊時寫斯人畫格獨羽毛愛此天然非物假  
由來象外有神助猶恨當時知者寡聖朝至治登虞唐  
手持玉燭調陰陽賢人在位吉士出豈以異物克禎祥  
王君矯矯人中鳳端合置之白玉堂超宗奇毛本異種  
吾見先公居廟廊君當奮飛隘八極我已避路看翱翔  
太平有象須黼黻不獨文字爭輝光

王世賞席上題林良鷹熊圖

坡陁連延出林麓孤鷹盤拏熊蹯伏金眸耀日開蒼烟  
健尾捎風起平陸由來異物乃同性意氣飛揚兩撐矗  
山跑野掠紛路岐何事相逢輒相肉側睨翻疑批亢來  
迅步直欲空壁逐乾坤蒼茫色慘淡落木蕭颼滿空谷  
羣豺斂跡百鳥停萬里長空齊注目是誰畫者誠崛竒  
筆勢似與渠爭速坐間賓客皆起避堦下兒童駭將蹴  
當筵看畫催索詩卷帙不待高閣束平生搏擊非我才  
欲賦真愁成刻鵠微酣對此髮雙豎酒令詩籌復相督

頓令拙劣成粗豪一飲步兵三百斛

題黃宗器秋官所藏何太守山水圖

濕雲浮空山欲動亂壑回峯互吞湧當溪獨樹雨冥冥  
青苔覆地春陰重深山白石幽人居鉤簾寂寂坐看書  
竹橋入林野有簌草閣傍水門無車行人細路隔山腳  
曳杖前登後還卻浦口輕舟信往還鐘聲遠寺空寥廓  
此中可釣亦可耕不然且濯滄浪纓酒酣夢覺兩相失此  
興豈獨憐丹青風流太守何侯筆三十年來已蕭瑟君

今愛惜須久傳予亦題詩坐終日

題錢世恒所藏王孟端墨松卷次饒介之舊韻  
松根成龍石作羝仙山稜層隔天梯層陰疊翠聳雲漢  
下視百丈紅塵低左慈幻術有真偽葉公畫格空雄雌  
九龍山翁不同調韋偃畢宏為等夷寒聲不斷殷幽壑  
細影欲動搖晴漪恍若臨流聽清籟芒屨布袍隨所之  
須臾晝暝神鬼泣虺蜴怒呌蛟鼉悲問翁胡為不畫竹  
王子似厭參差吹人間拙匠枉學步此翁聲名難並馳

強揮筆管潑墨汁凡骨卻笑神仙癡未論遺蹟為世寶  
已覺紙價高當時殘縑片楮久不見二丈吳牋藏者誰  
梁公老去陳氏滅此調豈有知音知手探靈脂掘石髓  
江東錢翁元好奇胸中撐拄不平事海水側立虞山危  
家藏況復有聲畫臨川老饒清妙詞郎君少年今壯髮  
風木忽動皇魚思平泉樹石米家舫往事逝矣何能追  
篇成頗覺古意遠撫卷載誦徂徠詩

懷麓堂集卷七